

FORMANNSPISTILL

ÁGÆTU HJÚKRUNAR- FRÆÐINGAR

Ólafur Guðbjörn Skúlason



ÉG VIL byrja á að þakka ykkur fyrir það traust sem mér er sýnt með endurkjöri sem formaður Félags íslenskra hjúkrunarfræðinga tímabilið 2015-2017. Starf formannsins er krefjandi og viðamikilið og í hverjum degi er fólgin nýr lærdómur. Ég tel það forréttindi að fá að starfa fyrir hönd hjúkrunarfræðinga og mun halda áfram að gera mitt besta til að vinna að hagsmunum þeirra og hjúkrunar á Íslandi.

Í fyrsta sinn kemur Tímarit hjúkrunarfræðinga eingöngu út á rafrænu formi. Í framboði mínu til formanns árið 2013 heyrði ég á röddum félagsmanna að tímaritið ætti að vera á rafrænu formi og hætta ætti prentun þess. Þessar raddir hafa farið hækkandi og ákvað stjórn félagsins í samvinnu við ritnefnd þess að stíga þetta skref að fullu. Íslenska þjóðin les nú í auknum mæli blöð og tímarit á rafrænum miðlum og eru hjúkrunarfræðingar þar ekki undanskildir. Það að flytja Tímarit hjúkrunarfræðinga á rafrænt form hefur ekki einungis fjárhagslegan sparnað í för með sér fyrir félagið heldur hefur þetta jákvæð áhrif á umhverfið allt. FÍH tekur þannig virkan þátt í verndun þess. Annar kostur fylgir þessari útgáfu en það er sú staðreynd að auðveldara og ódýrara er að gefa út fleiri tölublöð á ári sé vilji fyrir hendi hjá ritnefnd Tímarits hjúkrunarfræðinga. Það er von stjórnar FÍH að þessi breyting verði öllum hjúkrunarfræðingum til góða og auki ánægju félagsmanna með Tímarit hjúkrunarfræðinga. Þegar þetta er skrifað er einn dagur í fyrirhugað verkfall



hjúkrunarfræðinga. Í umræðum sem skapast hafa í kringum verkfall okkar kemur glögglega í ljós að hjúkrunarfræðingar eru hryggjarstykki í íslensku heilbrigðiskerfi. Hjúkrunarfræðingar eru fjölmennasta heilbrigðisstéttin og verður heilbrigðiskerfið ekki rekið án okkar þátttöku.

Ég hef orðið var við mikla samstöðu meðal hjúkrunarfræðinga. Við höfum staðið saman sem klettur og ekki látið deigan síga. Við gerum eðlilega kröfu um að laun hjúkrunarfræðinga séu í samræmi við laun annarra háskólamenntaðra starfsmanna og að tekin séu ákveðin skref í að útrýma kynbundnum launamuni hjá opinberum starfsmönnum. Slík krafa er eðlileg og hógvær.

Ég vona að þegar þessi pistill birtist hafi þegar verið samið við okkur hjúkrunarfræðinga. Ef ekki þá skulum við halda áfram að standa við bakið hvert á öðru og krefjast þess sem réttmætt er og sanngjarnt.

Ég óska ykkur gleðilegs sumars kæru hjúkrunarfræðingar. Ég vona að þið náðið að slaka á og njóta tilverunnar með vinum og vanda mönnum og komið endurnærð til starfa á ný að sumarleyfi loknu.

